

HISTORIAE PISCIVM

LIBER IV.

DE PISCIBVS EXOTICIS.

TITVLVS I.

De Piscibus squammosis.

CAPVT I.

De Tajafica, Paru, Pira-Acangata, et Acarauna.

Poterant quidem et isti, quos hoc libro trademus pisces, ad sua genera in praeteritis referri: verum cum tarde nimis ipsorum descriptiones et icones in manus nostras pervenerint, coacti sumus eos peculiari libello includere.

Tajafica itaque prout Brasiliensibus vocatur: piscis est octo aut novem digitos longus, corpore obterete et pyramidalis, extenuatur enim versus caudam. *Caput* est illi grossiusculum et compressum: *Oculi* eminentes et nigri, circello aureo: os edentulum. Sex habent pinnas; nimirum sub qualibet branchia unam oblongam, sub his in medio inferius unam breviorē: unam in medio dorso, aliam longiorem versus postremam dorso partem, et e regione hujus unam in infimo corpore: septima est cauda, oblonga et in exitu rotundata. Tegitur squammulis parvis, coloris hyalini pallidi, maculis variis fuscis vermiculatis variegatus per totum, exceptis pinnis postbranchialibus et infimo ventre, quae ex pallido subflavescent. Cauda est undata fusco. Latet in arena absconditus; ideoque capitur pedibus, eos ponendo super arenam ubi latet.

Coctus atque assatus bene sapit et convenit cum Hollandorum *Post*, est enim carne albissima et friabili.

PARV, Piscis est latus et subrotundus, verum haud crassus, novem aut decem digitos longus ab ore ad pinnam caudae, quae duos et semis digitos longa et totidem lata: latitudo piscis septem digitorum. *Pinnas* obtinet sex: duas magnas ac latas duos circiter di-

gitos; unam in dorso, alteram in ventre, quae utrobique ad caudam extenduntur; habetque quaevis pinna in fine prominentiam instar funiculi, ea videlicet, quae in dorso quinque digitos, quae in ventre tres digitos longam. Post branchias in quolibet latere etiam pinna est duos digitos longa, unum lata; et duas in inferiori ventre sub his, duos digitos longas, angustissimas. *Capite* est parvo, ore elato, angusto, minutissimis dentibus albi coloris; oculis conspicuis, flavo circello circumdatis. Totum corpus vestitur squammis mediocribus, quarum dimidius numerus niger est, dimidius autem flavescent, ita ut lunulas flavas in nigricante corpore gestare videtur. Circa branchias flavedo est, et in initio pinnarum, post aures macula flava in qualibet.

Piscis est edulis.

PIRAACANGATA, id est, piscis duro capite: *Percae* mediae magnitudine, septem aut octo pedes longus, ore haud amplo, oculis nigris, circello nigricante aureo et rufo colore mixto. *Pinnas* habet sex et septimam pro cauda: duas postbranchiales, duas in infimo ventre junctas, unam versus posteriora in ventre, et unam per totius dorso longitudinem usque ad caudam extensam et erectam, firmis spinis suffultam, quam in vaginam recondere potest. Pinna caudae furcata. Tegitur squammulis argenteis, aureo et igneo colore transplendente, praesertim in dorso: in ventre in argenteo thalassinus color translucet.

*Sen Harders
Digitos*